

25/10/1998

Estrada berhasrat jumpa Mahathir

KUALA LUMPUR: Presiden Filipina, Joseph Estrada berhasrat mengadakan perbincangan dua hala dengan Perdana Menteri, Datuk Seri Dr Mahathir Mohamad ketika menghadiri sidang kemuncak Kerjasama Ekonomi Asia Pasifik (Apec) di sini bulan depan.

Duta Filipina, Jose S Brilloutes ketika mengesahkan kedatangan Estrada semalam berkata, presiden itu juga berhasrat menemui Datuk Seri Anwar Ibrahim sekiranya dibenarkan.

"Saya tidak pasti Kerajaan Malaysia akan menjemput secara rasmi untuk melawat bekas Timbalan Perdana Menteri, tetapi kenyataan dibuat beliau (Anwar) boleh dilawati.

"Presiden mengalu-alukan peluang itu, tetapi saya tidak fikir ada jemputan rasmi," katanya di perasmian Bengkel Latihan Pemimpin-pemimpin Wanita Serantau, di sini semalam.

Bengkel selama seminggu anjuran Institut Pengurusan Wanita dirasmikan oleh Menteri Luar, Datuk Seri Abdullah Ahmad Badawi, yang diwakili timbalannya, Datuk Dr Leo Micheal Toyad.

Dr Mahathir dalam temu ramah khas dengan lapan pertubuhan media Jepun, berkata Anwar diberi layanan istimewa walaupun undang-undang menetapkan setiap orang diberi layanan serupa tanpa mengira kedudukan mereka ketika dalam penjara.

Perdana Menteri berkata, bekas timbalan perdana menteri diberi layanan istimewa dan beliau rasa Estrada boleh melihatnya sama ada layanan yang diberikan betul atau tidak.

Brilloutes berkata, pihaknya sedang mengatur perbincangan dua hala di antara Dr Mahathir dan Estrada, termasuk perkara yang akan dibincangkan.

Mengenai bantahan rakyat negara ini mengenai kenyataan Estrada, beliau berkata surat bantahan itu sudah dihantar kepada kerajaannya dan hasilnya Kerajaan Filipina membuat kenyataan tidak akan mengulas mengenai keadaan yang berlaku di Malaysia.

"Menteri Luar (Datuk Abdullah Badawi) sendiri menyatakan beliau menghubungi rakan sejawatnya di Filipina dan Indonesia, dan saya yakin mereka memberi kerjasama seperti semangat Asean," katanya.

(END)